

# CUMÙNI DI LUNGÒNI



## Ciurràta Mundiali di la Puisia

La dì 21 di Malzu, casca la Ciurràta Mundiali di la Puisia. Chista ciurràta fusi signalata illu 1999 da l'Unesco (organizzaziòni pa' prumu li rasgiunamènti infra li poppuli di tutta la tarra e piveppiu pa' prumu la paci) pà celebrà la Puisia chi è una folma di cumunicà di li più antichi e ca' la cunnòsci, faéddha no tantu pal mèzu di li paràuli, sinnò che pal mèzu di l'emoziòni.

Li poetti, chi in Gaddhura viniani chjamàti canzunadóri, àni un módu sóiu di figghjulà lu mundu e ci impàrani a ascultà primma ancóra di faiddhà e a vidè l'almusura chi 'èmu intundu.

Charlie Chaplin, lu còmicu inglésu, dicìa chi "La Puisia è una littara d'amóri indirizzàta a lu Mundu". Candu si scrìi una puisia, no sò tantu impulanti li paràuli, sinnochè la biddhèsa chi punìmu in chissi paràuli e diffatti sò pròppiu li sòni e la musica, chi èscini a fóra candu ligghìmu una puisia, chi fèlmani in capu.

Dunca podariami dì chi la puisia è un'alta lingua o fòlma di cumunicà parò no sèlvi studiàlla comu la chi ci impàrani inn'iscòla palchì l'almusura di lu mundu, siddhu 'ulèmu, la pudèmu intuppà a dugna mumèntu, imparèndi a ascultàcci e a figghjulà li còsi di tutti li dì, cambièndi lu módu di figghjulà. No sarà pal casu chi la ciurràta signalata pà la Puisia sia la mattèssi dì chi cumència lu branu cu' li Sò' culóri e l'almusura di la natura chi tòrra a nascì più bèddha di primma e dugna 'òlta diffarènti.

